

光緒山西通志

鄉賢錄九

錄二之九

山西通志第一百二十四

賜進士出身頭品頂戴兵部侍郎兼都察院右副都御史巡撫山西提督軍務臣張爾康

旨監修

宋建隆至天禧

郭守文并州太原人父暉漢護聖軍使從周祖征河中戰死
守文年十四居喪哀毀周祖召隸帳下廣順初補左班殿直
遷東第二班副都知宋初遷西頭供奉官選知簡州太平興
國初乘傳撫諭蕃部西夏悅伏三年遷西上閣門使夏汴水
決甯陵董宋亳丁壯四千五百塞之冬又護塞靈河縣決河
征太原分護行營馬步軍會劉繼文據代州討平之俄護定
州屯兵大破遼于滿城以功遷東上閣門使領澶州刺史召
拜內客省使八年滑州房村河決命塞之率禁兵數萬援雄

州遼人遁去雍熙二年屯三交領武州團練使破夏州鹽城
鎮宓羅賦等十四族斬首數千級俘獲生畜萬計又破咩鬼
族殲焉銀麟三州歸附者凡百二十五族萬六千餘戶西鄙
遂甯五年春爲幽州道行營前軍步軍水陸都監爲遼流矢
所中氣色不撓督戰益急軍中服其量坐退軍左遷右屯衛
大將軍明年復職拜宣徽北院使屯鎮州改南院使鎮州路
都部署冬大破遼騎于唐河端拱三年卒年五十五贈侍中
諡忠武追封譙王遣中使護喪歸葬守文沈厚有謀略出言
溫雅未嘗忤人意中使言守文死軍士皆流涕上問何得此
對曰守文得俸祿賜賚悉犒勞士卒死之日家無餘財上嗟
嘆之賜其家錢五百萬爲眞宗納其女爲夫人卽章穆后也
子崇德太子中舍崇信西京左藏庫使同知皇城司贈福州

觀察使諸司使無廢朝贈官例崇信崇儼咸特示優禮崇德子承壽虞部員外郎天禧五年錄承壽子若水爲太常寺奉禮郎崇仁爲解州團練使

袁繼忠振武人徙并州父進周階州防禦使繼忠蔭補右班殿直宋平澤潞討并汾悉預攻戰征蜀隸劉廷讓有功知雲安軍歷嘉州二州監軍伐廣南爲先鋒壕砦遷供奉官護隰州白壁關屯兵累入河東境破三砦近戍主將懼無功以所獲分與之改天平軍巡檢太宗初遷閣門祇候擊破梅山洞賊又巡遏邊部於唐龍鎮從征太原預破虜揚軍先登陷陣遼師入代境擊走之遷通事舍人護高陽關屯兵破遼師長城口殺獲數萬璽書褒美趙保忠獻地綏州刺史李克憲偃蹇遣繼忠諭旨竟率克憲入朝遷西上閣門副使定河西諸

州大破西人於葭蘆川遷引進副使護定州屯兵遷西上閤門使雍熙三年爲定州路行營馬步軍都監從田重進取飛狐下靈邱平蔚州擒其帥大鵬翼師還殿後行列甚整重進欲殺降卒繼忠救免之遷判四方館事領播州刺史易州靜塞騎兵尤驍果李繼隆取隸麾下旣而契丹陷靜塞城盡俘騎兵妻子繼隆疑軍怨已欲分隸諸將繼忠曰不可但奏升其軍額優以廩給使之盡節可也衆皆感悅繼忠因自請隸麾下會遼師駐唐河北諸將欲堅壁待之繼忠曰今彊敵在近城中屯重兵不能翦滅顧令長驅深入豈折衝禦侮之道乎我將身先士卒死於寇矣辭氣慷慨衆壯之靜塞軍摧鋒先入遼師大潰璽書獎諭厚賜于之遷引進使護鎮定高陽關兩路屯兵卒年五十五繼忠長厚忠謹士大夫多與遊前

後賜資鉅萬悉以犒士旣死家無餘蓄子用成雍熙初第進士至太常博士

呼延贊并州太原人父琮周淄州馬步都指揮使贊少爲驍騎卒太祖以其材勇補東班入承旨遷驍雄軍使從討西川當前鋒身中數創以功補副指揮使太平興國初親選軍校以爲鐵騎軍指揮使從征太原先登乘城及堞而墜者數四賜金帛獎之俄從崔翰戍定州翰言其勇擢馬步軍副都軍頭稍遷內員僚直都虞侯獻陣圖兵要及樹營砦之策求領邊任召見自陳武藝具裝執韃馳騎揮鐵鞭棗槊旋繞廷中數四又引其四子必興必改必求必顯以入更迭舞劍槩槊賜白金衣帶端拱二年厯遼州刺史復爲都軍頭領扶州刺史加康州團練使咸平二年從幸大名爲行宮內外都巡檢

上嘗補軍校皆敘已功贊獨進曰臣月俸百千所用不及半
忝幸多矣不敢更求遷擢再拜而退三年卒贊有膽勇驚悍
輕率常言願死於敵徧文其體爲赤心殺賊字至妻孥僕使
皆然諸子耳後刺曰出門忘家爲國臨陣忘生爲主所作破
陣刀降魔杵鐵折上巾兩旁有刃皆重十數斤絳帕首乘騅
馬冬月嘗以水沃孩幼冀長耐寒而勁健必顯後擢副都軍
頭

楊業并州太原人父信漢麟州刺史業幼倜儻任俠善騎射
畋獵恆倍獲嘗曰我他日用兵亦猶用鷹犬逐雉免爾弱冠
事劉崇爲保衛指揮使以驍勇聞累遷建雄軍節度使屢立
戰功所向克捷國人號爲無敵太宗征太原素聞其名嘗購
求之旣而其主繼元降上遣中使召見業大喜以爲右領軍

衛大將軍授鄭州刺史上以業老於邊事復遷代州兼三交
駐泊兵馬都部署密封橐裝賜予甚厚會遼師入雁門自西
陁出由小陁至雁門北口南嚮背擊之遼師大敗以功遷雲
州觀察使仍判鄭州代州自是遼人望見業旌旗卽引去主
將戍邊者多忌之或潛上謗書上皆不問封其奏以付業雍
熙三年北征命業副潘美爲雲應路行營都部署以西上閣
門使王侁軍器庫使劉文裕護其軍諸軍連拔雲應寰朔四
州師次桑乾河會班師美等歸代州未幾詔遷四州民於內
地令美等以所部兵護之時遼復陷寰州業謂美等曰宜領
兵出大石路先遣人密告雲朔州俟大軍離代州日令雲州
衆先出我師次應州卽令朔州民出城直入石碣谷遣强弩
千人列谷口以騎士援於中路庶保萬全侁曰但趨雁門北

川中鼓行而往文裕亦贊成之業曰不可此必敗之勢也侁語侵之業曰業非避死蓋時有未利徒令殺傷士卒而功不立今君責業以不死當爲諸公先將行泣謂美曰此行必不利業太原降將分當死上不殺寵以連帥授之兵柄非縱敵不擊蓋伺其便將立尺寸功以報國恩今諸君責業以避敵業當先死於敵因指陳家谷口曰諸君於此張步兵彊弩爲左右翼以援俟業轉戰至此卽以步兵夾擊救之不然無遺類矣侁陣谷口使人望之以爲遼師敗走欲爭其功卽令兵離谷口美不能制業力戰至暮果至谷口望見無人卽再率帳下士力戰身被數十創士卒殆盡業猶手刃數十百人馬重傷遂爲遼人所擒其子延玉亦沒焉業太息曰上遇我厚期討賊捍邊以報而爲姦臣所迫復何面目求活耶乃不食

三日死上聞之痛惜甚詔贈太尉大同軍節度賜其家布帛千匹粟千石大將軍潘美降三官監軍王侁劉文裕胥除名業不知書忠烈武勇有智謀練習攻戰與士卒同甘苦代北苦寒但挾纊露坐理軍事傍不設火侍者殆僵仆而業怡然無寒色爲政簡易御下有恩故士卒樂爲之用朔州之敗麾下尙百餘人業謂曰汝等各有父母妻子與我俱死無益也可走還報衆皆感泣不肯去淄州刺史王貴殺數十人矢盡遂死餘亦死無一生還者聞者皆流涕朝廷錄其子供奉官延朗崇儀副使次子殿直延浦延訓供奉官延環延貴延彬殿直

楊延昭本名延朗後改焉業之子也幼沈默寡言多戲爲軍陣業曰此兒類我征行必從太平興國中補供奉官業攻應

朔延昭爲先鋒戰朔州城下流矢貫臂鬪益急以崇儀副使
厯知保州緣邊都巡檢使就加如京使咸平二年冬遼攻遂
城城小無備長圍數日遼蕭后督戰衆心危懼延昭悉集城
中丁壯登陴賦器甲護守會大寒汲水灌城上旦悉爲冰堅
滑不可上遼人潰去獲鎧仗甚衆以功拜莫州刺史屢請益
兵於傅潛不許及潛抵罪召赴行在屢得對訪以邊要上甚
悅指示諸王曰延昭父業爲前朝名將延昭治兵護塞有父
風深可嘉也厚賜遣還是冬遼南侵延昭伏銳兵于羊山西
自北掩擊且戰且退及西山伏發遼衆大敗獲其將函首以
獻進團練使與保州楊嗣並命上謂宰相曰延昭等並出疏
外以忠勇自效朝中多忌朕力保庇以及此六年徙甯邊軍
部署景德元年詔益延昭兵滿萬人延昭上言遼師頓澶淵

去北境千里人馬俱乏雖衆易敗凡有剽掠率在馬上願飭諸軍扼其要路衆可殲焉卽幽易數州可襲而取不報乃率兵抵遼境破古城俘馘甚衆及請和選邊州守臣御筆命知保州兼緣邊都巡檢使二年追敘守禦勞進防禦使俄徙高陽關副都部署在屯九年大中祥符七年卒年五十七延昭智勇善戰所得俸賜悉犒軍未嘗問家事出入騎從如小校號令嚴明與士卒同甘苦遇敵必身先行陣克捷推功于下故人樂爲用在邊防二十餘年遼人憚之目爲楊六郎及卒上嗟悼之遣中使護櫬歸河朔人多望柩而泣錄三子官常從門客亦試藝敘之

楊文廣字仲容廷昭子以班行討張海有功授殿直范仲淹宣撫陝西與語奇之置麾下從狄青南征知德順軍爲廣西

鈴轄知宜邕二州治平中上以文廣名將後且有功自左藏
庫使累擢秦鳳副都總管韓琦使築築城文廣聲言城噴
珠率衆急趨築比暮至其所部分已定遲明敵騎大至知
不可犯而去遺書曰當白國主以數萬精騎逐汝文廣襲之
斬獲甚衆或問其故答曰此必爭之地彼若知而據之則未
可圖也詔褒諭賜襲衣帶馬知涇州鎮戎軍爲定州路副都
總管遷步軍都虞候遼爭代州地界文廣獻陣圖并取幽燕
策未報而卒贈同州觀察使

慕容德豐字日新太原人太尉延釗次子也幼聰悟八歲父
鎮山南補衙內指揮使父卒授如京使征太原領御砦南面
巡檢征南唐爲洞子都監尋爲昇州都監以廉潔聞俄領蔚
州刺史太平興國二年知愛州兼邠甯都巡檢使嘗破小遇

族奪名馬數十匹詔褒諭居任九年簡靜爲治邊鎮安之雍
熙四年使登萊閱強壯還拜西上閤門使出爲定遠軍鈐轄
命領後陣中隊別將萬騎以禦邊屢知邢延二州又代侯延
廣知靈武就賜白金三千兩改四方館使徙慶州又改靈州
兼部署穀貴出私廩振饑全活者衆轉引進使賊入境擊走
之咸平二年遷客省使知鎮州遼南侵繕兵固守餉饋不絕
詔獎之改知滄州德豐輕財好施厚享將士身居邊陲母與
妻孥尙留京貧甚特給團練使俸尋進潁州團練使知貝瀛
二州五年卒年五十五家無餘財子惟素至殿內承制
慕容德琛延釗從子蔭補供奉官累遷內殿崇班知夔州李
順黨張餘領衆十萬舟千艘來寇與戰龍山斬首千餘級又
與白繼贊擊斬二萬餘悉焚其舟賊剽開州圍雲安德琛往

援又斬百餘級累詔褒諭歷西京作坊左藏副使咸平二年轉崇儀荆湖北路鈐轄蠻擾澧鼎境與戰於北汶奪耕牛鎧甲斬馘以歸徙峽路鈐轄未至復知夔州景德中領梧州刺史復任峽路遷莊宅使并代鈐轄知憲州天禧初改右監門衛大將軍

尹憲并州晉陽人開寶中事太宗藩邸卽位擢殿直充延州保安軍使改供奉官太平興國四年護府州屯兵與鄜州三族會攻嵐州破敵千餘擒知州馬延忠拔緣河諸砦以功轉西京作坊副使入朔州界破甯武軍殺其軍使獲人馬器甲甚衆轉供備庫使護夏州兵殺戮三漢醜奴莊岌伽羅膩葉十四族及誘其渠帥屢降詔書褒美雍熙初就知夏州攻破地斤澤李繼遷遁走俘獲四百餘帳憲奏請抽移諸帳於所

部別置騎兵號曰平砦以備用詔從之俄殺蘆關及南山野
狸數族代還爲洪州巡檢尋護莫州屯兵三年知瀛州兼兵
馬鈐轄淳化初爲四方館使連護鎮定屯兵改知貝州移高
陽關兵馬鈐轄五年知定州與部署王榮不協榮毆憲仆因
疾卒年六十三

吳元載并州太原人節度使廷祚子也建隆初授太子右春
坊通事舍人賜緋魚袋廷祚鎮秦雍補衙門都校後授供奉
官太平興國三年加閤門祇候使邈九年擢西上閤門副使
出知陝州雍熙三年徙秦州州民李益爲長道縣酒務官家
饒財僮奴數千指長吏皆畏之民負息錢郡爲督理推官馮
伉不從益遣奴拽下馬毀辱之伉屢表不得達後因市馬譯
者附表以聞詔元載逮捕權貴已報益益亡命物色急捕之

獲於河中府民郝氏家御史府具得其狀斬之益子光祿寺丞仕衡除籍民皆飯僧相慶端拱初遷西上閤門使淳化二年領富州刺史俄徙知成都府王小波擾不能捕滅受代歸時李仕衡通判華州遣人閔行裝元載拒之仕衡抗章疏其罪坐責郢州團練副使移單州授左衛將軍致政卒年五十三子昭明內殿崇班昭矩太子中舍

吳元展字君華元載弟太平興國八年尙蔡國公主授左衛將軍駙馬都尉明年領愛州刺史進團練使雍熙三年表求試劇郡命知鄆州尋知河陽還朝改鄴州觀察使特詔朝會序班次節度使祿賜悉增之再知河陽道化五年秋霖河溢城將壞元展躬涉泥滓督工補塞民多構木樹杪命濟以舟楫設餅餌以食時澶陝悉罹水災河陽賴以安眞宗初換安

州觀察使知澶州咸平三年轉運使劉錫上其治狀詔嘉獎
遷甯國軍留後知定州時王超王繼忠踰唐河與遼戰元辰
度其必敗急發州兵護河橋超輩果敗遼人乘之至橋見陣
兵甚盛遂引去考滿吏民詣闕貢馬疏其善政十事願借留
樹碑表德政詔褒之屬歲旱吏白召巫以土龍請雨元辰曰
巫本妖民龍止獸也安能格天惟精誠可以動天乃設壇潔
齋三日百拜祈禱澍雨霑洽景德三年知潞州初并代澤潞
皆分轄成卒後并於太原至是以元辰臨鎮遂分領澤潞晉
絳慈隰威勝七州軍戎事委元辰專總之加檢校太傅知徐
州大中祥符四年改領山南東道卒年五十贈中書令謚忠
惠子弟進秩者五人五年葬時上元欲觀燈上爲移次夕元
辰性謹讓待賓佐以禮喜讀春秋左氏聲色狗馬不介意祿

賜卽給親族公主乳媼得入參宮禁元屢慮其妄有請託白
上拒之眞宗深所嘉嘆於駙馬中獨稱其賢及歿甚悼惜之
子守禮六宅使澄州刺史以國甥特贈和州防禦使守嚴內
殿崇班天禧中祿守嚴子承嗣承緒殿直守良內殿崇班守
讓閣門祇候

劉美太原人父通仕至都指揮使以女爲眞宗后卒贈太師
中書令美初事眞宗於藩邸以謹力被親信卽位補三班奉
職再遷右侍禁大中祥符二年護屯兵漢州厯遷供奉官徙
嘉州撫循士卒有恩改內殿崇班提點在京倉場東西八作
司以舉職聞遷洛苑副使八年預修大內以勞改南作坊使
同勾當皇城司天禧初遷洛苑使領勤州刺史與周懷政聯
職未嘗阿附親從卒偵遷按籍分番均使焉三年授龍神衛

四廂都指揮使領昭州防禦使改侍衛馬軍都虞候五年加武勝軍節度觀察留後卒年六十廢朝三日贈太尉昭德軍節度仁宗贈侍中子從德字復本美卒年十四自殿直遷供備庫副使後知衛州薦縣吏李熙輔於朝后喜曰兒能薦士知所以爲政矣卽日擢京官從事鄭驤亦擢美官改恩州兵馬都總管知相州旣而卒年二十四贈保甯軍節度使封榮國公諡康懷

劉永年字君錫從德子生四歲授內殿崇班仁宗使賦小山詩有一柱擎天語上誤投金杯瑤津亭下戲曰能取之乎永年一躍持出上拊其首曰奇童子也常置內中年十二始聽出外累遷廉州團練使爲陝州都監郭邈山等爲盜密遣壯士夜渡河殺其渠二十餘人衆遂散遷鈐轄擢幹辦皇城司

改單州團練使永興軍路總管副張昇使遼遼人夜取巨石塞驛門手擲棄之遼人驚以爲神出知涇州賜詩寵之郡兵歲以香藥爲折支三司不時輦致振武卒突入通判聽事請以他物代給語不遜召至庭下數其罪斬二人餘不敢動同提舉在京諸司庫務知代州遼取西山木焚之一夕盡上稱善遼移檄捕縱火盜永年曰盜固有罪然發在我境何須汝事乃不敢復言上嘗問禦戎策對合旨書忠孝字以賜英宗遷沂州防禦使復知代州歷步軍馬軍殿前都虞候太原定州路副都總管征安南請先士卒渡富良江不許遷扈州觀察使步軍副都指揮使卒贈崇信軍節度使諡曰莊恪

劉從廣字景元美次子始生補西頭供奉官遷內殿崇班侍仁宗左右後眞拜崇州團練使娶荆王元儼女爲滁州防禦

使時年十七自言夏竦起不能扞疆場坐耗縣官願上所給公使錢上嘉納之爲羣牧都監改副使特拜宣州觀察使同勾當三班院請補外知洺州漳水溢穿隋故渠以殺水勢洺人便之徙邢州籍鄉軍罷老者聽引子弟自代著爲令召領三班院出知襄州徙正定府路馬步軍副都總管卒贈昭慶軍節度使謚良惠從廣性謹飭喜交士大夫當時稱之

李延渥并州晉陽人靜江節度進卿子也蔭補供奉官尋爲開門祇候三遷西京左藏庫使咸平初知冀州六年徙瀛州景德元年十月遼師抵城下四面夾攻延渥率州兵強壯又集巡檢史普所部乘城發礮石巨木擊之皆纍纍而墜殺傷甚衆翼日遼主與其母親鼓衆急擊延渥分兵拒守益堅遼人遁去死者三萬餘傷倍之獲鎧甲兵矢竿牌數百萬賜錦

袍金帶將士繙錢遷本州團練使初戍棚垂板護城纔數寸
許遼師射之矢集其上凡二百餘及請葺城詔取板視之上
亟稱其勞二年徙知邢州大中祥符八年以疾換右領軍衛
大將軍領濱州團練使明年以左武衛大將軍致仕天禧初
卒子宗禹內殿崇班

王貽永字季長并州祁人侍中文獻公溥孫也性清慎寡言
不好聲伎生十餘歲時舅魏咸信見而奇之曰後當類我咸
平中尙鄭國公主授右衛將軍駙馬都尉從封泰山領高州
刺史再遷右監門衛大將軍獎州團練使求外補得知單州
眞宗曰和衆靜治所宜先也眞拜治州團練使徙徐州河決
徐大水作隄城南以禦之改衛州進懷州防禦使知澶定二
州又知鄆州州介梁山多水患貽永相度地勢爲築東西道

三十餘里民使之復徙定州又徙成德攝同知樞密院事改
副使加宣徽南院使進樞密院使久之拜同中書門下平章
事加兼侍中徙節鎮海以疾求罷遣上醫診視上臨問頒尙
方珍藥手取糜粥飲之貽永願罷樞筦解使相上冀其愈聽
罷侍中徙節彰德同平章事樞密使如故至和初復以疾辭
拜尙書右僕射檢校太師兼侍中景靈宮使卒贈太師中書
令諡康靖貽永能遠權勢在樞密十五年迄無過失人稱其
謙靜子道卿西上閣門使

以上太
原府

裴濟字仲溥絳州聞喜人唐相耀卿八世孫徙河中少事晉
邸糾同輩過失被譖出補太康鎮將譖者尋坐法太宗知濟
可任補殿直爲天威軍兵馬監押又令監軍易州遼攻城不
能下遷西頭供奉官太平興國末江表盜起命爲巡檢遷崇

儀副使召還遷使監戍兵於威虜軍次鎮州賊騎夜扣城門大呼曰官軍至矣州將促開關濟遠止之曰此必妄也及旦果有敵兵遯去上嘉之遷西上閣門使定州都監統加行營鈐轄尋知定州契丹三萬騎來攻逆擊於徐河斬數千級獲牛馬鎧仗甚衆洎化初判四方館尋爲鎮州行營鈐轄又與李繼隆擊賊於唐河濟短兵陷陣賊大敗走優詔褒美初繼隆以濟性剛不悅之及是恨相知之晚至道二年改內客省使知鎮州立春出土牛卒摔牛去濟亟命擒之果有竊發者數十人已劫廕問矣悉蒐捕腰斬之軍民肅然在鎮定十五年威績甚著召還知天雄軍咸平初領順州團練使知靈州兼都部署謀緝八鎮興屯田民甚賴之三年清遠軍陷夏人斷饗道絕援軍濟刺指血染奏求救甚急兵不至城陷死之

特贈鎮江軍節度三子並優進秩濟有聲望及沒夏人皆惜
子德裕虞部郎中德基如京使德豐殿中丞濟兄麗澤弟麗
正並進士及第麗澤右補闕麗正金部員外郎麗正子德與
殿中丞

裴德裕濟子以錄廢自四門助教拜太子右贊善大夫累官
少府監勳上柱國爵開國侯以老分司西京爲吏廉清不擾
始知蓬絳解號澤沂六州皆有能政

劉綜字居正河中虞鄉人少依外兄通遠軍使董遵誨遵誨
嘗遣貢馬太祖嘉其敏辨將授三班綜自陳素習詞業願應
科舉及還上解真珠盤龍衣令賜遵誨綜辭曰遵誨人臣安
敢當此上曰吾委遵誨方面不以此爲疑也雍熙二年第進
士爲邛州軍事推官就改永康軍判官遷大理評事判眉州

轉太僕寺丞代還對便殿言益州長吏望慎擇其人上是之
改太子中允未幾果有李順之擾復召見面賜緋魚尋爲三
門發運司水陸轉運使通判大名府服闋知建安軍至道二
年遷太常丞職事修舉多稱薦之咸平初出爲河北轉運副
使嘗言州縣幕職官以昏濫罷者其間實有廉謹之士全
藉祿廩以濟朝夕墾自今竝除致仕官又言法官斷獄皆引
律令及其奏御復云慮未得中別取進止殊非一成不變之
道望降旨約束時河北幕職州縣官多不習風俗請竝以河
朔人充之徙陝西轉運副使轉太常博士梁鼎議禁解鹽官
自貨鬻命綜與杜承睿制置青白鹽事綜條上利害力言非
便卒罷其事時獻言者多請棄靈州綜上言靈州民瀉土沃
爲西陲巨屏所宜固守以爲扞蔽然後於蒲洛河建軍城屯

兵積糧爲之應援此暫勞永佚之勢也况鎮戎軍與靈州相接今若棄之則原渭等州益須設備較其勞費十倍而多利害之理昭然可驗俄充轉運使嘗言西川荆湖江浙福建廣南知州或地居津要或戶口繁庶望親加選任其執政舊臣及給舍以上知州處亦宜擇通判又京朝官當任遠官者率以父母未葬爲辭宜禁從之五年拜工部員外郎兼侍御史知雜事六年遷起居舍人再爲河北轉運使繼領漕任號爲詳練上眷矜甚厚嘗急輒資其奏處遼請和乃遣近臣諭以擢用意景德三年召拜戶部員外郎樞密直學士四年西幸道出河陽權知孟州事復知并州以政績聞州民乞留優詔嘉獎歸朝知審官院改吏禮二部郎中充職兼知通進銀臺封駁司大中祥符四年館伴契丹使因作大雪歌以獻卽命

同知貢舉俄權知開封府以貴要交結富民奏授試秩頗素
公政請加抑止從之七年命知廬州授右諫議大夫八年卒
年六十一綜強敏有吏材所至抑挫豪右振舉文法時稱幹
治子建中正中竝贊善大夫弟綽洎化三年進士官刑部郎
中

薛顏字彥回河中萬泉人舉三禮中第爲嘉州司戶參軍代
還對稱旨改將作監丞以祕書省著作佐郎使夔峽疏決刑
獄還改太子左贊善大夫初丁謂招撫溪蠻有威惠詔謂自
舉代謂薦顏爲峽路轉運使累遷尙書虞部員外郎始孟氏
據蜀徙夔州於東山據峽以拒師而民居不便也顏爲復其
故城命勾當廣南東西路轉運司事平宜州賊陳進遷金部
員外郎改河東轉運使祀汾陰徙陝西河中浮橋歲敗顏卽

北岸醞上流爲支渠以殺水怒因取渠水溉其旁田民利之
奏請罷坊鑿則晉礬當大售後如其策徙河北厯知河陽杭
徐州累遷光祿少卿以少府監知江甯府邏者晝劫人執平
人以告顏視其色動曰若眞盜也械之果引伏轉右諫議大
夫知河南府仁宗初遷給事中徙知應天又徙耀州豪姓李
甲結客數十人號沒命社顏索其黨會赦特杖甲流海上餘
悉籍於軍以光祿卿分司西京卒

張鑑字德明猗氏人藏英孫也父裔陰補供奉官鑑本將家
幼能嗜學入衛州霖落山肄業凡十餘年太平興國三年第
進士爲大理評事監泰州柴墟榷務升右贊善大夫知婺州
就遷著作郎還拜監察御史決獄江左多雪寃滯厯殿中侍
御史曹彬等北伐鑑上疏極言不可判三司度支憑由催欠

司王明李惟清薦其能用爲江南轉運使豪富爲民患鑑以名聞令部送魁首赴闕以三班職名羈縻之又建議置臨江軍時以爲便召還特被慰獎累擢樞密直學士知通進銀臺封駁司淳化中遣鑑與西京作坊使馮守規偕往屯西蜀召對後苑門面授方略鑑曰益部新復軍旅不和若聞使命驟至易其戎任慮或猜懼請假臣安撫之名上稱善付空名宣頭及廷臣數人鑑與知益州張詠卽遣部戍卒出境王繼恩麾下使臣亦多遣東還督繼恩輩分路討捕殘寇而鑑招輯反側事平歸拜左諫議大夫戶部使會五路進討西夏詔鑑專督軍糧饋運頗集眞宗初遷給事中使如故咸平初改工部侍郎出知廣州居二年民條其政績上請刻石三年移知朗州溪洞羣蠻數寇擾鑑召酋豪諭以威信皆俯伏聽命徙

知相州有芝草生於監牧鑑表其祥以爲河朔弭兵之兆優
詔答之景德初卒年五十八子士廉殿中丞士宋太子洗馬
士程屯田員外郎

薛田字希稷河中河東人少師种放與魏野善第進士起家
丹州推官李允正辟延州從事向敏中薦其材改著作佐郎
知中江縣累遷益州路轉運使民間以鐵錢重私爲券以便
交易謂之交子富家專其事數至爭訟田請置交子務以權
出入後寇瑊用其議蜀人便之就除陝西轉運使進直昭文
館知河南府復入爲度支副使使遼還擢龍圖閣待制知天
雄軍尋擢知開封府以樞密直學士知益州還爲左司郎中
知審刑院羌人內寇遷右諫議大夫知延州以疾徙同州又
徙永興軍不行卒田性和厚以幹敏數爲大臣所稱云

蒲州上

府

李崇矩字守則潞州上黨人孤貧礪行鄉里推服漢祖次上黨史宏肇時爲先鋒開崇矩名署親吏周顯德初補供奉官從征高平以功轉供備庫副使改作坊使宋初征李筠率龍捷驍武左右射禁軍數千人屯河陽攻大會砦拔之斬五百級改澤潞南面行營前軍都監破筠衆於碾子谷入城命先收圖籍視府庫因上言願護父櫬歸許之賜予甚厚拜右監門衛大將軍充三司使從征李重進還爲宣徽北院使仍判三司乾德二年代趙普拜樞密使五年加檢校太傅開寶初從征太原班師命爲後殿崇矩以女妻趙普子承宗上不悅門下客鄭伸上書告其陰事崇矩不能自明出爲鎮國軍節度六年入爲左衛大將軍太平興國二年夏詔乘傳自陝至

滄棣按行河隄秋出爲邕貴潯賓橫欽六州都巡檢使尋移
瓊崖僑萬麾下咸憚行盡出器皿金帛數百萬分給之抵黎
城洞穴以財遺其酋長衆皆懷附代還拜右千牛衛上將軍
雍熙三年判右金吾街仗兼六軍司事端拱元年卒年六十
五贈太尉諡元靖崇矩性純厚寡言尤重然諾見史宏肇子
孫必厚禮之在嶺海四五年恬不以災荒嬰慮往來皆一日
渡海未嘗留滯飯僧至七十萬造像建寺尤多又喜黃白術
云

李繼昌字世長父崇矩與太祖善太祖誕辰必遣繼昌奉幣
常弔弱弓輕矢教以射法建隆三年蔭補西頭供奉官歷西
京作坊副使淳化中爲登萊沂密七州都巡檢使至道二年
拜西京作坊使峽路二十五州軍捉賊招安都巡檢使旋改

兵馬鈐轄賊酋喻雷燒以金帶遺繼昌偽納之賊懈不設備因掩殺進西京左藏庫使咸平三年討王均砮於城西門賊忽開城僞遁雷有終等各以所部徑入繼昌覺亟止之不聽因獨還砮賊閉闕發伏有終等僅以身免繼昌屯雁橋門三月破彌牟砮斬首千級大獲器仗進逼魚橋門均脫走入城嚴戒部下無擾民獲婦女童幼置空寺中俟事平遣還其家而急領兵追賊以功領獎州刺史俄知青州入掌軍頭引見司景德二年幸澶州遣先赴河上給諸軍鎧甲遼人請和令與其使姚東之偕往三年又使遼命知汝州兼兵馬鈐轄又知延州兼鄜延路鈐轄大中祥符元年進東上閤門使累遷左神武軍大將軍子遵勛尙萬壽長公主天禧初主誕日邀繼昌過其家迎拜爲壽上密以金帶器幣珍果美饌賜之拜

連州刺史出知涇州表求兩朝御書及謁拜諸陵皆許之二
年冬卒年七十二遣中使護櫬錄其子文晟殿中丞文旦侍
禁繼昌性謹厚爲治尙寬所至民懷之任峽路時縣胥謾芻
糧後期上官正令斬之繼昌徐爲解貸鄭伸早死母貧餓詣
繼昌乞丐與白金百兩時人稱之

李遵勛字公武繼昌子好爲文詞舉進士大中祥符間召對
便殿尙萬壽長公主初名勛上益遵字升其行授左龍武軍
駙馬都尉賜第永甯里堂壁多爲鸞鳳狀令鑄去主服有龍
飾悉屏藏之上歎喜領澄州刺史拜康州團練使給觀察使
祿時繼昌官刺史遵勛請班其下許之後繼昌守涇州疾遵
勛馳省不俟命上遣使令乘驛赴之旣還自劾慰諭之求補
郡自試出知澶州賜宴長春殿河水溢將壞浮梁督工徒七

日而隄成又知許州水軍多不練習命部校按劾拔去十七人後以疾請援唐韋嗣立故事求山林號不許初天聖間章獻后屏左右問人有何言遵勛曰臣無他聞但人言上旣冠宜以時還政嘗上三說五事以論時政晉國夫人林氏以后乳母多預國事密請置之別院出入伺察之其補助多此類師楊億爲文億卒爲制服及知許州奠億墓慟哭而返又與劉筠善筠卒存恤其家通釋氏學將死與浮圖楚圓爲偈頌卒贈中書令諡曰和文有問宴集二十卷外館芳題七卷

李端懿字元伯遵勛子性和厚喜問學通陰陽醫術星經地理之學七歲授如京副使侍眞宗稍長出入如家人七遷濟州防禦使爲羣牧副使知冀州爲政循法度民愛其不擾嘗知鄆州兼京東西路安撫使京東水大發倉廩振之置弓手

局教戰鬪遂如精兵治汾陽隄百餘里以卻水患民便之尋
除甯遠軍節度使以留後赴澶州卒贈威德軍節度使謚良
定再贈兼侍中端懿能自刻厲傾身下善故士大夫與遊甚
得名譽

李端愿字公謹遵勛子以穆獻公主恩七歲授如京副使四
遷恩州團練使仁宗以旱慮囚放宮女疏言縱釋有罪小人
之幸放宮女爲宦者專制反失所歸何以弭災變累進邢州
觀察使鎮東軍留後知襄鄧二州轉運使獻羨財數十萬端
愿言常賦三折其民不堪奪轉運使賞申折變之禁移廬州
富弼謂曰肥上之政何以減於襄陽端愿曰初官喜事飾廚
傳以干名則譽者至更事旣久知抑豪彊制猾吏故毀隨之
弼深然其言英宗初同提舉在京諸司庫務上拱默端愿求

對曰當躬攬權綱以係人心不宜退託失天下望拜武康軍節度使知相州除醴泉觀使神宗遣使就其家錄章奏詔褒之河東城囉兀手寫趙普諫太宗北伐疏以聞請老以太子少保致仕凡大禮成賜金帶器幣品數視執政哲宗進太子太保欽聖后以甥舅嘗幸其第致禮獻穆祠堂命近侍掖端愿勿拜元祐六年卒輟朝臨奠賻典加等贈開府儀同三司子評字持正嘗以樞密都承旨出使陝西河東還言鄜延之人皆謂城囉兀非便乞速毀撤征南安調兵及河東又言大軍南征而取卒於西北使蠻聞之得以窺我後爲成州團練使知蔡州卒年五十二贈冀州觀察使

李端慤字守道導勛子官左藏庫使執獻穆喪辭起復詔特給俸累遷東上閣門使元祐中以安德軍留後卒贈昭德軍

節度使諡曰恭敏兄端懿嘉祐時嘗密請建儲及卒端懿護喪歸元豐間褒舊稟上之神宗歎曰近世之賢戚也由是端懿名益著

李處耘潞州上黨人唐司徒驤子也幼隨兄處疇至汴遇張彥澤斬關入獨當里門射殺十數人曉復關又殺數人里中賴之漢初折從阮帥府州召委軍務周顯德中署河陽右職帥李繼勳奇之俾掌河津處耘曰津往來懼有姦不可不察居數月果得契丹遺西川江南蠟書即遣處耘部送遂隸太祖帳下補都押衙會駐軍陳橋處耘見軍中謀遂白太宗與王彥昇謀召馬仁瑀李漢超等定議始入白處耘臨機決事謀無不中授客省使兼樞密承旨右衛將軍從平澤潞遷羽林大將軍宣徽北院使討李重進爲行營兵馬都監知揚州

勤於撫綏奏減城中屋稅民皆悅服建隆三年詔歸老幼遮道涕泣累日不得去拜宣徽南院使兼樞密副使賜甲第一區詔慕容延釗討朗州以處耘爲都監入辭上親授方略令會兵漢上適內酒坊副使盧懷忠使荆南還具言可取狀遂命圖之處耘至襄州先遣閤門使丁德裕假道荆南請具薪水給軍荆人請供芻蕘百里外又遣德裕諭之乃聽命遂令軍中曰入江陵城有不由路及擅入民舍者斬師次荆門高繼沖遣其叔保寅及軍校梁延嗣奉牛酒犒師處耘待之有加諭令翌日先還延嗣大喜報繼沖荆門距江陵百餘里是夕召保寅等宴飲延釗帳處耘密遣輕騎數千倍道前進繼沖遽聞大軍至卽惶怖出迎遇於江陵北十五里處耘揖繼沖令待延釗遂率親兵先入登北門比繼沖還則兵已分據

城中荆人束手聽命卽發江陵卒萬餘人并師晨夜趨朗州
又先遣別將分麾下及江陵兵趨岳州大破賊於三江口又
遇賊帥張從富於澧江擊敗之延釗大軍繼至朗人縱火焚
城而潰遂入潭州盡得荆湖地初師至襄州衢肆鬻餅者倍
取軍人直處耘命斬於市以徇延釗小校司義凶恣處耘召
義呵責至白湖延釗圍人入民舍鞭其背延釗怒斬之由是
大不協更相論奏朝議以延釗宿將貰其過謫處耘爲滑州
刺史卒年四十七廢朝贈宣德軍節度檢校太傅賜葬洛陽
偏橋村處耘有度量善談當世務常以功名爲己任荆湖之
役臨事專制不顧羣議遂至於貶太祖追念之爲太宗納其
次女爲妃卽明德后也子繼隆繼和繼恂洛苑使順州刺史
贈左神武大將軍繼恂子昭遜供備庫使處疇作坊使子繼

疑

李繼隆字霸圖處耘子蔭補供奉官處耘貶除籍以入貢復舊官乾德中選爲果閫監母將輔以處耘左右繼隆曰是行兒自有立豈須此輩代還夜涉棧道與馬偕墜絕澗絙於大樹而免命領雄武卒三百戍邵州蠻賊數千截其道率衆力戰賊遁去太祖聞其勇敢器重之又襲袁州破桃田砦追賊二十里入潭富砦焚其梯衝芻積復督荆湖漕運吳人多出舟師斷餉道屢與關糧悉善達旦馳四五里往來覘候一日遇虎射殺之嘗獲吳將斬其首以獻上益嘉之且追念處耘謂曰昇州平可持捷書來當厚賞汝時內侍十數輩不願入奏繼隆獨請赴闕因言在途遇大風晦暝城破之兆也翌日捷奏至太祖召之曰如汝所料矣吳將盧絳聚衆攻掠命招

來之錄功遷莊宅副使從幸西洛改御營前後巡檢使太平
興國二年改六宅使護浚京西河又治決河以已舟易梁迤
弊舟舟覆棲枯桑杪以免從征太原爲四面提舉都監領梯
衝地道攻城四面機石過其旁從卒仆死督戰無怠攻幽州
領先鋒破遼數千衆及圍范陽又爲先鋒大敗遼衆於湖翟
河南後爲鎮州都監遼侵邊諸將以陣圖上所命不可違繼
隆曰事有應變安可預定設獲遼詔罪請獨當卽從宜而行
敗之於徐河四年遷宮苑使領媯州刺史護三交屯兵與潘
美出征破靈邱縣盡略其人以歸改定州駐泊都監嘗出土
鐙砦與遼戰獲牛羊車帳甚衆詔書褒美命擊李繼遷四月
出銀州俘斬甚衆改領環州團練使又護高陽關屯兵從曹
彬攻幽州破遼衆數千於固安南下固安新城進克涿州矢

中左股血流至踵獲遼貴臣一人彬欲上其功繼隆止之俄而傳潛米信軍潰獨繼隆振旅還卽令知定州三年遷侍衛馬軍都虞侯出爲滄州都部署逾年加領觀察使端拱初授侍衛馬軍都指揮使領保順節度九月出爲定州都部署初朝議令堅壁清野一日敵驟攻滿城至唐河護軍袁繼忠慷慨請出師中黃門林延壽等止之繼隆曰閩外之事將帥得專乃與繼忠出兵戰數合擊走之二年冬送芻粟入威虜軍遣于越率騎八萬來邀繼隆領步騎裁一萬先命千人設伏城北十里而與尹繼倫列陣以待敵衆方食繼倫出不意擊走之繼隆追奔過徐河俘獲甚衆淳化四年夏召還面獎改節靜難軍復遣還屯尋爲河西行營都部署李繼遷遁擒趙保忠以獻至道二年白守宗等敗於洛浦河亟命繼隆爲靈

環十州都部署是秋五路討繼遷命繼隆出環州取東關鎮曲赤檉苦井路赴之繼隆以所出道回遠乏水請由棗馳路徑趨賊巢上遣周瑩齋手詔督其進軍赤檉繼隆以便宜發兵與丁罕行十餘日果不見賊而還先是軍糧赴靈州必由旱海路自冬至春芻粟始集繼隆請由古原州蔚茹河路便衆議不一繼隆固執上許之遂率師以進壁古原州令如京使胡守澄築城是爲鎮戎軍眞宗初改節鎮安軍檢校太傅踰月召還加同中書門下平章事解兵柄歸鎮咸平四年改節山南東道判許州景德初明德廢失詔赴關冬幸澶淵表求扈從命爲駕前東西排陣使先赴澶州陳師北城外毀車爲營敵數萬騎急攻與石保吉率衆禦之追奔數里及上至幸北門觀兵召問慰勞見其所部整肅歎賞久之翌日幸營

中召從臣飲宴二年春加開府儀同三司食邑實封會疾作
駕親臨問卒年五十六駕又臨之制服發哀贈中書令謚忠
武錄其子昭慶洛苑使從子昭遠昭邈內殿崇班乾興初詔
與李沆王旦同配享眞宗廟庭繼隆感慨自樹深沈有城府
好讀春秋左氏傳喜名譽賓禮儒士太宗特親信之委以機
要眞宗以元舅之親不欲煩以軍旅優游近藩恩禮甚篤然
多智用能謙謹保身明德欲面見之但詣萬安宮門拜牋終
不入又嘗命諸王詣第繼隆不設湯茗第假王府從行茶爐
烹飲焉

李昭亮字晦之繼隆子四歲補東頭供俸官許出入禁中繼
隆北征遣昭亮持詔軍中問方略及營陣還奏稱旨累遷西
上閤門使出爲潞州兵馬鈐轄徙領麟府路軍馬事累守代

州再徙真定路都總管保州兵叛遣王果招之兵乘埤呼曰
得李步軍來我降矣昭亮從輕騎數十人叩城門呼曰爾輩
第來降我保其無虞也卒稍稍縋城下明日開門降改淮康
軍節度觀察留後復知定州敕使存勞賜黃金三百兩給節
度俸以褒其功明年拜武寧軍節度使爲殿前副都指揮使
昭亮習軍中事政尙嚴多所建請萬勝龍猛軍蒲博徹屋椽
相擊捕斬之杖其主者諸軍股慄祠南郊騎卒亡弓會赦昭
亮曰宿衛不謹不可貸卒配隸下軍拜同中書門下平章事
判大名府仁宗書塗金紋羅曰李昭亮親賢勳舊命其子惟
賢持以賜徙定州改節天平彰信泰甯爲景靈宮使改節昭
德卒贈中書令諡良僖昭亮和易練習近事於吏治通敏善
任僚佐以故素更藩鎮無他過云

李惟賢字寶臣昭亮子蔭三班奉職爲閣門祇候通事舍人累遷西上閣門使尋領高州刺史知莫州倉粟陳腐戍兵大譟弗肯受惟賢馳往諭曰邊兵衆則積粟多能無陳腐乎欲盡取新則陳者何所歸斬首惡一人流十人軍中帖然召還提舉諸司庫務領榮州團練使知冀州會遷補禁軍犯賊汚者皆紉爲下軍惟賢曰武士何可責以廉節且抵罪在昔今不可以新令繩之乃更其制徙恩州遷四方館使卒惟賢善宣辭令習朝儀仁宗愛之

李繼和字周叔處耘子蔭補供俸官三遷洛苑使洎化後兄繼隆多在邊任繼和常從行友愛尤至每令入奏機事繼隆罷兵柄手錄唐李勣遺戒授繼和曰吾門不墜者在爾矣初繼隆請城鎮戎軍不果行繼和面奏曰平涼舊地山川險阻

旁扼夷落爲中華襟帶城之爲便太宗許焉後復不守咸平
中繼和又言乃命版築以繼和知軍兼涇原渭儀都巡檢使
城畢加領平州刺史建議募貧民及弓箭手墾田積粟又屢
請益兵朝議未許上曰苟緩急部署不爲濟師則或至失援
矣命兼涇原儀渭鈐轄五年領兵殺衛埋族於天麻川自是
隴山外諸族皆內附願置要害戍守繼和因請移涇原部署
於鎮戎以壯軍勢又請開道環延爲應援上以其精心戎軍
甚嘉之戎人一夕塞長壕越古長城抵城下繼和與都監史
重貴禦之賊據險再突城墮列陣接戰重貴中重創敗走之
大獲甲騎詔嘉獎之別出良藥縑帛牢酒以賜繼和習武藝
好談方略所至幹治然御下少恩部兵終日擐甲常如寇至
代還六年出爲并代鈐轄景德初徙北平嘗駕駐瀘淵與魏

能張疑領兵赴趙州躡敵後遼請和又命副張疑爲緣邊巡檢安撫使事平復還并代時詔書有當行極斷語官吏不詳深意卽遽大辟繼和言其事乃詔悉須裁奏先是繼隆卒繼和恥以遺奏得官久之遷西上閣門使未幾擢殿前都虞候領端州防禦使大中祥符元年卒年四十六贈鎮國軍節度遣諸王赴弔二子早卒令三班主家事

王陟潞州上黨人淳化三年進士補鳳州團練推官督運有勞遷晉州觀察推官至道初度支李擇言薦爲著作佐郎通判大名府眞宗尹京留爲開封司錄參軍以謹幹被待遇卽位召賜緋魚袋改著作耶進推官乘傳陝西督餉靈武咸平初遷太常博士爲河東轉運使賜金紫時趙保吉納款屢遣陟與內侍張崇貴裁度邊事正其經界又副崇貴使夏州賜

詔命代歸同考試貢士及封印卷首改工部員外郎知棣州
召入判三司鹽鐵勾院卒上以京府之舊甚憫之錄其子若
拙奉禮郎後官太常博士若谷太廟齋郎及陟妻卒又命給
其子俸

以上
安府

辛仲甫字之翰汾州孝義人曾祖實石州推官祖迪壽陽令
父藩河東節度判官仲甫少好學及長能吏事器局沈厚周
廣順中郭崇署掌書記顯德初從鎮潼淵崇親吏爲廂虞侯
部民有被劫殺者訴陰識賊魁卽捕盜吏也官不敢詰仲甫
請自捕逮鞠之吏故稽其獄仲甫曰民被寇害而使自誣服
蠹政甚矣焉用僚佐爲請易吏以雪冤憤崇悟移鞠之乃得
實狀崇移鎮真定改深趙鎮觀察判官太祖受命陳思誨密
奏崇有姦狀遣中使馳往驗之仲甫曰第遠偵使者率僚屬

盡郊迎禮聽彼伺察久當自辨矣崇如其言使者至視崇無他意還奏上大嘉歸罪於思誨仲甫又隨鎮平盧崇卒改鄆齊累雪寃枉乾德五年入拜右補闕出知光州州有橫河與城直會霖潦暴疾水溢潰廬舍仲甫集船數百艘軍資民儲皆賴以濟六年移彭州州卒謀長春節爲亂屬仲甫出城巡視見壕中草深意可藏伏命燒薙之凶黨疑謀泄自首擒百餘人盡斬之太祖問羣臣文武兼資者爲誰趙普以仲甫對徙益州兵馬都監代還選爲三司戶部判官太平興國初遷起居舍人使遼遼主問党進何如人如進比有幾仲甫曰國家名將輩出如進鷹犬材耳尙足道哉遼主欲留之仲甫曰信以成命義不可留有死而已竟不能屈使還以刑部郎中知成都府奏免歲輸銅錢罷榷酤政尙寬簡蜀人安之八年

加右諫議大夫時彭州盜賊連結誘令自縛詣吏者凡百餘人餘因散去九年入知開封府拜御史中丞雍熙二年拜給事中參知政事端拱中進戶部侍郎淳化二年以足疾罷爲工部尙書出知陳州代歸會蜀有寇以仲甫素著恩信將令與疾招撫以疾未行尋加太子少保致仕眞宗加太子少傅咸平五年卒年七十四贈太子太保子若冲若海若濛若濟若渝皆能其官孫有孚有隣胥舉進士

王嗣宗字希阮汾州人曾祖同節寶鼎令祖待價汾州防禦推官父夢證成州軍事判官嗣宗少力學自奮開寶八年進士第一補秦州司寇參軍知州路冲政苛乘間極言其闕失冲繫嗣宗又教無賴民訟之獲直太宗征河東嗣宗上陳邊事授大理寺丞通判睦州改右贊善大夫徙河州武德卒潛

察遠方事嗣宗械送京師因奏曰今不委任天下賢俊猥信此輩以爲耳目臣竊不取太宗怒削秩尋復之以祕書丞通判澶州並河東西植樹萬株以固隄防入爲三司開折推官以左正言充河北轉運副使就賜緋魚將議親征上言遼人必不至狀甚見嘉納改左司諫厯京西轉運使移河北貝州驍捷卒謀竊發率吏悉擒之優詔嘉獎遷虞部郎中賜錢百萬至道初移河東轉運使累淮南轉運江浙荆湖發運使揚楚間有窄家神廟民疾不餌藥竭力致祀嗣宗撤其廟選名方刻石州門自是稍變漕運經泗州浮橋舟多覆徙置城隅遂獲安濟又請以公田均賜外任官就改職方咸平三年以漕運稱職就拜太常少卿踰年以右諫議大夫充三司戶部使改鹽鐵使請裁節冗費從之明年郊祀減雜物十萬大千

省工九萬九千改左諫議知通進銀臺司兼門下封駁事出知并州兼并代部署州境有臥龍王廟窮冬致祭老幼多踣道亟毀之轉運使鄭文寶上其政績詔褒美先是戰馬瘠弱送闕下這邈多斃建議就牧汾州從之召拜御史中丞加兼工部侍郎權判吏部銓嗣宗剛果無所憚每進見極談時事或及人間細務上優容之將祀汾陰以永興重地思得大臣才兼文武者鎮之拜嗣宗耀州觀察使知永興軍作詩賜之上言宜賜种放終南田百畝徙放嵩山上令放徙居嵩陽避之四年徙知邠州兼邠甯環慶路都部署城東有靈應公廟旁有山穴羣狐處焉民虔禱之長吏皆先謁廟後視事嗣宗毀其廟燬其穴得數十狐盡殺之淫祀遂息徙知鎮州發邊肅賊肅坐貶嗣宗嘗言徙种放掘邠狐按邊肅爲去三害居

二歲召還授樞密副使檢校太保累表解職授檢校太傅大
同軍節度知許州嘗游是州別墅在焉時人以爲榮移知河
南府天禧初改節感德又改靜南以左屯衛上將軍檢校太
尉致仕面辭特免舞蹈許其子扶掖之對數刻賜錢百萬還
許下月給俸五十千嗣宗睦宗族撫諸姪如已子著遺戒訓
子孫勿得析居又令以孝經弓劍筆硯置壙中五年卒年七
十八廢朝贈侍中諡曰景莊錄其子二人甥二人官嗣宗事
三朝最爲宿舊所至以嚴明御下著中陵子三十卷子堯臣
內殿承制唐臣太子中舍從子舜臣供俸官閣門祗候禹臣
太子中舍

趙昌言字仲謨汾州孝義人父叙從事使府太宗尹開封選
爲雍邱太康令後終安申觀察判官昌言少有大志趙逢高

錫寇準皆稱許之太平興國三年舉進士爲貢部首薦擢實
甲科爲將作監丞通判鄂州拜右拾遺直史館賜緋魚選爲
荆湖轉運副史遷右補闕改知青州入拜職方員外郎知制
誥預修文苑英華雍熙初加屯田郎中明年同知貢舉俄出
知天雄軍岐溝失律請誅曹彬等優詔褒答召拜御史中丞
河東用兵多條上邊事爲左諫議大夫代張宏爲樞密副使
遷工部侍郎坐備書翟頴上言事貶崇信軍節度行軍司馬
初太宗厚遇昌言垂欲相之趙普惡昌言剛戾將陷以頴獄
太宗特寬焉消化二年起知蔡州逾年召拜右諫議大夫或
議弛茶鹽禁以省轉漕命爲江淮兩浙制置茶鹽使昌言極
言非便上趣往固執如初以戶部副使雷有終代之卒以無
利罷昌言復知天雄軍大河貫府境豪民峙芻茭誘姦人潛

穴隄防歲仍決溢一日隄吏告急命徑取豪家膚積以給用
自是弊遂絕澶州河決流入御河索禁卒佐隄役不進昌言
怒曰府城將墊人民且渴汝輩食厚祿欲坐觀耶敢不從命
斬衆股慄赴役不浹旬城完手詔褒諭之召拜給事中參知
政事俾乘疾置以入卽赴中書時連雨請出廐馬分牧外都
或以盛秋備敵馬不可闕昌言曰塞下積水敵必不至從之
未幾王小波李順搆亂於蜀獨請發兵無使滋蔓始命王繼
恩等進討賊平改戶部侍郎罷政事知鳳翔府徙澶涇延三
州眞宗初遷兵部侍郎知陝州移知永興軍咸平三年與呂
蒙正寇準同召以本官兼御史中丞知審官院加工部尙書
仍兼中丞孟州民常德方訟臨津尉任懿以賄登第乃知舉
王欽若受之昌言以聞欽若自訴詔邢昺覆案坐昌言故入

奪官貶安遠軍行軍司馬移武勝軍景德初拜刑部侍郎判
尚書都省幸澶淵以盟津居要地增屯兵命知河陽歷知天
雄軍徙鎮州遷戶部侍郎大中祥符二年卒年六十五贈吏
部尚書諡曰景肅錄子慶嗣爲國子監丞賦祿終喪從孫允
明同學究出身昌言喜推獎後進掌漕湖外時李沆通判潭
州謂有台輔之量表聞於朝王旦宰岳州平江一見識其遠
大以女妻之後皆爲賢相王禹偁自卑秩搢詞職亦昌言所
薦也昌言強力尙氣概當官無所顧避所至以威斷立名慶
嗣至太子洗馬

侯延廣汾州平遙人父仁矩歷通祁雄三州刺史悉以延廣
補牙職在雄州方宴寇數十騎白晝入州城延廣引親信數
騎馳出射殺其酋一人斬數級悉擒餘黨仁矩喜拊其背曰

興吾門者必汝也監軍李漢超以聞詔褒美賜錦袍銀帶仁矩卒補西頭供俸官從黨進討太原太平興國初護延州軍兼緣邊巡檢普撫士卒下樂爲用戎人畏服遷閤門祇候時求可使徼巡西北邊者近臣言延廣將家子習邊事遷崇儀副使充同鄜坊延丹緣邊都巡檢使延廣力疾入辭賜名藥及方遣太醫隨侍戎人聞延廣至不敢復爲寇叛卒劉渥嘯聚千餘人謀入京兆延廣率兵數百自間道追之會於富平西十五里挺身與渥鬪大樹下斷渥右臂渥脫走乘勢大敗其衆渥創甚止谷中後數日爲追兵所獲渥素號驍勇無敵至是羣盜喪氣餘黨稍自歸關右以定擢拜崇儀使淳化二年命領獎州刺史知靈州賜金帶名馬部下嚴整戎人悅服李繼遷避其鋒會驍將李繼隆討趙保忠以延廣護軍旣而

夏臺平保忠就縛手詔褒美賜資甚厚師還留爲延州鈐轄
會節帥田重進耄以延廣同知州事兼緣邊都巡檢使監軍
康贊害其功誣奏延廣得虜情恐後倔強難制遂詔還以慕
容德豐代之部內甚不治至道間繼遷寇靈州同知樞密院
事錢若水稱延廣可使就拜甯州團練使知靈州兼兵馬都
部署賜白金二千兩歲增給錢二百萬延廣獨引數十騎之
鎮戎人素服其威名皆相率引避二年春病遣御醫馳視延
廣謂中使李知信曰延廣家世受國恩今日得死所矣但恨
未立尺寸功耳言訖卒年五十賙賻甚厚以其子爲六品正
員官子紹隆東染院使帶御器械紹隆子宗亮右侍禁閣門

祇候

以上汾州府

宋太初字永初澤州晉城人太平興國三年進士解褐大理

評事通判戎州以善政聞詔褒美選將作監丞贊善大夫轉太常丞雍熙三年通判成都府求直言著守成箴以獻涪化初遷監察御史厯京西河東轉運使改殿中侍御史至道初遷兵部員外郎充鹽鐵副使時陳恕爲使凡有規畫必咨恕未嘗自用其功恕甚德之改刑部郎中充陝西轉運使眞宗召還復命經度陝西餽運咸平初拜右諫議大夫知江陵府蠻寇擾動以便宜制遏詔獎之三年再知梓州俄代雷有終知益州命爲川陝四路都轉運使要切之務俾同規畫與鈐轄楊懷忠不協亟召還命權御史中丞先是按劾有罪必豫請旨太初以爲失風憲體獄成然後聞上時論黜之俄出知杭州以疾改廬州連徙汝光二州景德四年卒年六十二錄其弟繼讓試校書郎太初性周慎所至有幹職譽嘗著簡譚

三十八篇其序略言禮之中庸伯陽之自然釋氏之無爲其歸一也嘗以古聖之道契當世之事而患未博也忽外物觸于耳目內機發于性情因筆而簡之以備闕忘云子傳慶太

子中舍

澤州府

折御卿雲中人府州節度德晟子也幼補節院使兄御勳知州事署兵馬都校御勳徙鎮召爲閑廐副使知府州太宗征河東命與尹憲領屯兵攻嵐州破岢嵐軍擒其軍使折令圖以獻遂下嵐州又殺其憲州刺史霍翊擒其將馬延忠等七人遷崇義使清化三年四遷爲府州觀察使五年拜永安軍節度使遼師萬餘入寇大敗之於子河汭太宗遣使問之對曰敵緣山峽小徑入謀剽略臣諜知之遣人邀其歸路因縱兵擊走之人馬墜崖谷死者相枕其大將韓德威僅以身免

皆聖靈所及非臣之功也上嘉之歲餘德威謀知御卿病率衆來侵以報子河漢之役御卿力疾出戰德威不敢進會疾甚其母密遣人召歸御卿曰世受國恩邊寇未滅御卿罪也今臨敵棄士卒自便不可死於軍中乃其分也爲白太夫人無念我忠孝豈兩全言訖泣下翊日卒年三十八上聞悼惜久之贈侍中以其子惟正爲洛苑使知州事惟正歸朝以其弟惟昌繼之

折惟昌御卿子繼知府州事咸平二年河西黃女族及唃訛引趙保吉衆入寇麟州萬戶谷進至松花砦惟昌與從叔同巡檢使海超弟供俸官惟信赴戰臂中流矢墜馬攝弓起得裨將馬突圍出海超惟信沒焉九月保吉黨萬私保移埋復來寇與宋思恭劉文質合戰於埋并峰敗走之又破言泥族

拔黃砦焚其器甲車帳俘斬甚衆以功領富州刺史改文思
使景德元年與王萬海破賊砦護芻糧抵麟州秋入朔州界
破狼水砦時遠方圍岢嵐軍遁去明年拜興州刺史大中祥
符二年赴闕命近臣與射於苑中宴賜甚厚上言先臣御卿
蒙賜旗三十竿以壯軍容請別給賜許之七年河東運糧赴
麟州出兵爲援力疾領步騎屯甯遠砦冒風沙而行時疾已
亟猶與賓佐晏飲談笑自若明日卒年三十七以其弟惟忠
繼之

折惟忠字盡臣初以兄惟信戰沒補西頭供奉官擢閤門祗
候及惟昌卒爲六宅使知府州兼麟府都巡檢使領普州刺
史再遷左藏庫使眞拜嘉州刺史改資州進蘭州團練使母
喪起雲麾將軍卒惟忠知兵事天聖中遼夏會兵境上聲言

嫁娶惟忠規實往備之戒士卒毋輕動一夕風霾有騎走營中言寇至惟忠堅臥不動徐命擒之得數誕馬蓋寇所縱也既卒錄其弟姪子孫七人以其子繼宣嗣州事久之特贈惟忠耀州觀察使寶元中繼宣坐指刻降左監門衛將軍楚州都監以其弟右侍禁繼閔繼之官至西京作坊使

折繼閔字廣孝慶厯中元昊攻麟州不克進圍州城城險且堅東南有水門厓壁峭絕阻河賊緣厓後微徑魚貫而前城中矢石亂下賊轉攻城北士卒復力戰賊多死傷引去繼閔以城守勞特遷宮苑使普州刺史後領果州團練使自元昊拒命招輯歸業凡三千餘戶皇祐二年卒以其弟繼祖繼之繼祖字應之臨政二十餘年奏乞書籍仁宗賜以九經韓絳發河東兵城囉兀爲先鋒深入敵帳降部落戶八百加解州

防禦使卒繼祖子當襲州事請以授兄之子克柔詔從之而進其三子官錄二孫爲借職繼世亦繼閔弟少從軍爲延州東路巡檢嵬名山內附繼世先知之遣其子克勲報种諤諤用是取綏州分名山之衆萬五千戶居於大理河夏來攻再戰皆捷諤逮繫以兵付之遂同名山守綏州錄功領忠州刺史說韓絳城囉兀以撫橫山因畫取河南策絳然之以左驥驥使果州團練使卒詔繼世蕃官捍邊有績特給賻禮

折克行字遵道繼閔子初仕軍府無所知名种諤拒夏人於環慶詔河東援之克行請往諤使以兵三千護餉道戰葭蘆川先登斬級四百降戶千馬畜萬計諸老將嬰然曰眞折太尉子也擢知府州王中正出塞克行先拔宥州每出必勝夏人畏之益左廂兵專以當折氏太原孫覽議城葭蘆克行卽

頓兵吐渾河約勒部伍爲深入窮討狀敵疑不敢動旣訖役又入津慶龍橫川斬級三千在邊三十年善拊士卒戰功最多羌人呼爲折家父官至秦州觀察使卒贈武安軍節度使子可大爲榮州團練使知府州

折可適克行從子也少工馳射薦試廷中補殿侍隸延州出塞遇敵馬索與鬪斬其首取馬而還益知名米脂之役與夏人戰三角嶺得級多又敗之於蒲桃谷夏人十萬人寇可適先得其守烽卒姓名詐爲首領行視呼出盡斬之烽不傳因卷甲疾趨大破之于尾丁磴回次權楊溝正午駐營分騎據西山曰彼若躡吾後腹背受敵必敗果舉軍來可適所部纔八千轉戰至高嶺乃從間道趣洪德設伏邀其歸路敵至伏發衝之其國母踰山而遁焚棄輜重衆赴崖澗死者如積論

前後功至皇城使成州團練使哲宗詔密圖夏寇名阿埋昧
勒都逋二酋會境上謀知之遣兵夜往襲并俘其族屬三千
人遂取天都山上爲御文德殿受賀以其地爲西安州遷可
適東上閤門使涇原鈐轄知州事爲副都總管帥鍾傳行邊
爲敵所隔以輕騎拔之得歸傳議取靈武環慶亦請出師命
可適將萬騎往卽薄靈州川俘獲甚夥而慶兵不至引還入
覲進武安軍節度觀察留後步軍都虞候後召爲佑神觀使
明年復爲渭州命其子彥質直祕閣參軍事數月卒年六十
一

畢士安字仁叟雲州雲中人曾祖宗昱雲中縣令祖珠雲州
別駕父父林終觀城令因僑觀城士安少好學事繼母祝氏
孝求師至鄭友楊璞韓丕劉錫因僑鄭乾德四年第進士邠

帥楊廷璋辟掌書奏開寶四年歷濟州團練推官掌筦權歲課增羨改兗州觀察推官太平興國初爲大理寺丞領三門發運事選知台州言錢氏上圖籍有司皆張侈賦數願一用舊籍從之明年遷左贊善大夫徙饒州改殿中丞召爲監察御史復出知乾州乞降任就養改監汝州稻田務雍熙二年遷左拾遺兼冀王府記室參軍太宗召諭賜襲衣銀帶鞍勒馬士安本名士元以犯王諱改焉遷考功員外郎端拱中以本官知制誥王願留府邸不許渇化二年召入翰林爲學士大臣以張洎薦上曰洎視畢士安詞藝踐歷固不減但履行遠在下爾三年知貢舉加主客郎中以疾改右諫議大夫知潁州壽王尹開封府召爲判官及正承華兼右庶子遷給事中登位命權知開封府拜工部侍郎樞密直學士時近臣強

取民間女士安因對奏還之官府常從授外任必令士女戒
勸咸平初拜禮部侍郎復爲翰林學士詔選官校勘三國志
晉唐書或言兩晉事多鄙惡士安曰惡以戒世善以勸後善
惡之事春秋備載上然之遂命刊刻以目疾改兵部侍郎出
知潞州特加月給入爲翰林侍讀學士景德初兼祕書監首
疏五事陳選將餉兵理財之策上嘉納李沆卒進吏部侍郎
參知政事入謝言寇準兼資忠義善斷大事此宰相才也正
所宜用未閱月以本官與準同拜平章事士安兼監修國史
居準上準爲相守正嫉惡小人日思傾之布衣申宗古告準
交通安王元傑準惶恐士安力辯其誣下宗古吏具得姦罔
斬之準乃安景德元年九月遼統軍撻覽至天雄兵號二十
萬上問策安出士安與準條畫禦備又合議請幸澶淵時已

詔巡幸而大臣猶進金陵成都圖土安亟同準請對力陳其不可惟堅定前計上嚴兵將行太白晝見流星出上台北貫斗魁或言大臣應之士安適臥疾移書準曰屢請昇疾從行手詔不許今大計已定唯君勉之士安得以身當星變而就國事心所願也已而少間追至澶淵遼師營瀧北伏弩射斃撻覽遼衆遁會曹利用使還具得要領又偕遼使姚東之來和議遂定歲遺銀絹三十萬朝論以爲過士安曰不如此遼所願不重和事恐不能久及罷兵從還乃按邊要選良守將各得其任令塞上得境外牛馬悉還之通互市除鐵禁招流亡廣儲畜未幾夏州趙德明亦款附量時制法次第施行復置賢良方正直言極諫等科二年章七八上以病求免優詔敦諭不得已復起視事十月晨朝至崇政殿廬疾暴作上步

出臨視已不能言詔內侍寶神宮以肩輿送歸第卒年六十
八駕臨之廢朝五日贈太傅中書令謚文簡士安端方沈雅
有清議所至以嚴正稱年耆目既讀書不輟有文集三十卷
嘗謂人曰僕仕宦無赫赫譽但力自規檢庶幾寡過爾凡交
遊無黨援惟王祐呂端見引重王旦寇準楊億相友善王禹
偁陳彭年皆門人也禹偁幼時以事至濟州官舍士安識其
非常童留之教以學舉業日顯後遂登科先進用士安知制
誥其命乃禹偁詞也子世長衛尉卿慶長大府卿孫從善光
祿少卿從古駕部郎中從厚從誨檢校水部員外郎從簡博
羅令從道殿中丞從範山南西道節度推官從益太常寺太
祝從周朝散郎知洋州會孫仲達仲偃至郡守仲衍仲游仲
愈案士安之先再世官雲州故占籍雲中宋史云代州雲中
人誤或據史以醇縣界有古雲中城目爲醇人殊牽就

畢仲衍字夷仲蔭陽翟主簿第進士調沈邱令歐陽修呂公
著薦之入司農爲主簿升丞吳充引爲中書檢正使遼宴射
連破的衆驚異密取其衣爲度制服以賜時預遼元會盡能
記其朝儀節奏圖畫歸獻以祕閣校理同知太常禮院爲官
制局檢討官損益刪補曲盡其當禁內間事必須仲衍然後
報他人不知也撰中書備對三十卷士大夫爭傳其書館高
麗使上元夕宴東闕下作詩誦聖德上次韻賜焉時以爲寵
擢起居郎未幾卒年四十三遣中使賻錢五十萬

畢仲游字公叔與仲衍同登第元祐初爲軍器衛尉丞召試
學士院同黃廷堅張耒晁補之輩策問蘇軾異其文擢第一
加集賢校理開封府推官出提點河東路刑獄太原銅器名
天下買二茶七去故相韓縝曰如公叔可謂眞清矣召拜職

方司勳二員外郎改祕閣校理知耀州歲大旱先民未饑揭
喻境內曰郡振施與平糴若干萬碩實虛張其數富室知有
備亦相勸發廩民就食者十七萬九千口無一人去其鄉徽
宗時歷知鄭鄆二州京南淮南兩運副使入爲吏部郎中仲
游早受知於司馬光呂公著不及用范純仁尤知之當國時
又適母喪故未嘗得尺寸進然亦墮黨籍坎壈散秩而終年
七十五爲文切於事理不爲浮誇誕戲語蘇軾在館閣頗以
言語文章規切時政貽書戒之司馬光爲政反王安石所爲
仲游又予之書光軾得書聳然驚如其慮弟仲愈歷國子監
丞諸王府侍講知鳳翔府坐兄仲游黨籍例黜上曰畢仲衍
被遇裕陵可除罪籍以爲都官郎中擢祕書少監卒

以上大
同府

党進朔州馬邑人幼事杜重威愛其惇謹後進貴重威子孫

貧困分月俸給之周廣順初隸二軍伍補散指揮使累遷鐵騎都虞侯宋初轉都校領欽州刺史乾德五年累遷彰信軍節度兼侍衛步軍都指揮使親征太原命副李繼勳將河東行營前軍開寶二年師臨晉陽置砦四面命進主東偏未成列太原驍將楊業領突騎數百來犯進奮身從數人逐業業急入陞中會援兵至緣繩入城獲免上激賞之六年改侍衛馬軍都指揮使領鎮安軍節度九年又命將河東行營兵征太原入境敗其軍於城北太宗初召還太平興國二年出爲忠武軍節度使在鎮歲餘遇疾卒年五十一贈侍中進形貌魁岸居常恂恂至振甲冑毛髮皆豎時稱党太尉故事都虞侯已上悉書所掌兵數于槌上如芴記一日上問所掌幾何進舉槌以示曰盡在是上以其朴直益厚之見閭里畜禽獸者

輒取而縱之罵曰買肉不供父母反飼禽獸耶太宗親吏臂鷹雛於市進欲放之吏曰此晉王鷹也進乃戒曰汝謹養視小民傳以爲笑子崇義閑廐使崇貴閑門祗候

以上朔平府

薛超遼州平城人少有勇力乾德初應募爲虎捷卒從崔彥進伐蜀錄功補虞侯遷十將太平興國初四遷至天武指揮使從征太原領遊騎千人備禦鎮定境上以張軍勢車駕還從大將劉廷翰率兵至徐河遇遼兵挑戰超躍馬直前連射斃數人敵勢遂卻大軍乘之奮斬萬餘級以功加步軍都頭神衛軍校領欽州刺史雍熙三年敵至雁門西陁敗之追至寰州又乘勝抵應州胥降還加馬步都軍頭淳化初屯鎮州遷天武指揮使領澄州團練使卒年五十七

遼州

李允正字修已并州孟人巡檢使謙溥子也蔭補供奉官掌

左藏庫又掌三班遷閣門祗候通事舍人淳化中命討戎瀘州蠻遷西上閣門副使提總汴城慮囚請詔御史臺給印紙作囚簿署禁繫月日庶無淹滯詔從之又提點左右藏屢乘傳北面經度邊要五年爲衛州修河部署會建清遠軍積石砦命詣瀚海部分其役還拜西上閣門使并州駐泊鈐轄俄知州事徙代州咸平初使蜀詢訪民事轉東上厯知鎮莫二州又爲并代馬步軍鈐轄駕駐大名率太原軍出土門來會所部廣銳騎士數百素練習命賜緡錢屯邢州與石保吉逐遼人遼人遁復還并代五年爲涇邠甯路鈐轄兼安撫都監又與錢若水同詣洪德懷安沿邊諸砦經度邊事加領誠州刺史復鈐轄并代進四方館使代馬知節爲鄜延部署兼知延州改客省使知定州兼鎮定都鈐轄大中祥符三年移河

陽部嘗以便養會張崇貴卒亟徙郾延部署領河州團練使
尤正頗知書性嚴毅疏財喜自修飭累典邊任徙永興軍卒
年五十一

李允則字垂範謙溥次子少以材略聞蔭補衙內指揮使改
左班殿直太平興國七年始置榷場於靜戎軍允則典其事
遷使河東路決繫囚原治逋欠又使荆湖路察官吏與轉運
使檢視錢帛器甲刑獄遂擢閤門祗候濬治京師諸河創水
門鄭州水磴西川賊劉旰平上官正議脩城未決命往視還
言西川以無城難守宜如正議又言兵分則緩急不爲用請
併屯要害以便餽餉高溪州蠻田彥伊入寇遣詣辰州悉招
輯之累遷供備庫副使知潭州眞宗曰朕在南衙畢士安嘗
道卿家世今以湖南屬卿初州人出絹謂地稅計屋輸絹謂

屋稅營田戶給牛歲輸米四斛牛死猶輸謂枯骨稅民輸茶自九斤至三十五斤允則請除三稅茶以十三斤半爲定制民皆便之湖湘山田多不耕令馬芻皆輸本色由是山田悉墾湖南饑先振而後奏曰須報踰月則飢者無及矣明年浔飢請以家貲質於轉使乃得發廩賤糶因募饑民堪役者隸軍籍得萬人轉運使請發募兵禦邵州允則曰今蠻不攬無名益戍是長邊患也奏罷之陳堯叟安撫湖民列治狀請留堯叟以聞召還連對三口上曰畢士安不謬知人遷洛苑副使知滄州允則濬浮陽湖葺營壘官舍間穿井遼尋來攻老幼皆入保而水不乏斲冰代礮遂解去轉鎮定高陽三路行營兵馬都監遼通好徙知瀛州上言朝廷已許和議但擇邊將謹誓約有言和好非利者請一切斥去遷西上閤門副使

何承矩爲河北緣邊安撫提點榷場及承矩疾詔自擇代乃請允則知雄州河北旣罷兵允則治城壘不輟詔詰之奏曰初通好不卽完治恐他日頽圯因此廢守則邊患不可測也上以爲然城北舊有甕城允則欲合大城爲一先建東嶽祠出黃金百兩爲供器道以鼓吹居人爭獻金銀久之密徹去聲言盜自北至下令捕盜三移文北界乃興版築揚言以護祠而卒就關城浚壕起月隄自此甕城中人內城中始州民多以草覆屋允則取材木西山大爲倉廩營舍始教民陶瓦甕標里開置廬市邸舍水磴城上悉累甕下環以溝塹蒔麻植榆柳廣間承翰所脩屯田架石橋構亭榭列隄道以通安肅廣信順安軍歲修禊事召界河戰棹爲競渡縱北人遊觀潛寓水戰州北舊多設陷馬坑城下起樓爲斥堠望十里自

罷兵人莫敢登允則曰南北旣講和矣安用此爲命徹樓夷
坑爲諸軍蔬圃濬井疏洫列畦隴築短垣縱橫其中植以荆
棘而其地益阻隘因治坊巷徙浮圖北原上州民旦夕登望
三十里下令安撫司隙地悉種榆久之榆滿塞下顧謂僚佐
曰此步兵之地不利騎戰豈獨資屋材耶上元舊不然鐙允
則結綵山聚優樂使民夜縱遊明日偵北帥欲間入觀允則
與同僚伺郊外紫衣人果至與人傳舍不交一言出女奴羅
侍左右劇飲而罷且置其箴廡下使遁去卽幽州統軍也後
數日爲遼所誅嘗宴軍而甲仗庫火作樂飲酒不輟副使請
救不答少頃火熄悉燼所焚物密遣吏持檄瀛州以茗籠運
器甲不浹旬兵數已完人無知者樞密院請劾狀上曰允則
必有謂姑詰之對曰兵械所藏燬火甚嚴方宴而焚必姦人

所爲舍宴而救事或不測一日有訴爲遼人毆傷而遁者允則不治與傷者錢二千衆以爲怯逾月幽州以其事來請荅以無有蓋他謀欲以毆人爲質驗比得報以爲妄乃殺諜雲翼卒亡入遼移文督還遼報以不知所在允則曰在某所遼人駭不敢隱卽歸卒乃斬以徇歷四方館引進使高州團練使天禧二年以客省使知鎮州徙潞州仁宗初領康州防禦使天聖六年卒允則不事威儀間步出遇民可語者延坐與語以是洞知人情訟至無大小而訊立斷善撫士卒皆得其用盜發輒獲身無兼衣食無重差不畜資財在河北二十餘年事功最多其方略設施雖寓於遊觀亭傳間後人亦莫敢墮至國信往來費用儀式多所裁定晚年居京師有自遼亡歸者皆命舍允則家允則卒始寓樞密院大程官營

平定州

王承美豐州人父某事契丹爲左千牛衛將軍開寶二年率衆來歸父卒授天德軍蕃漢都指揮豐州刺史太平興國七年與契丹戰斬獲萬衆擒其天德軍節度使韋太以獻明年契丹入寇擊敗其衆追至青冢百餘里斬獲甚衆尋請於州城置孔子廟許之

歸化城廳

右宋建隆至天禧五十二人